

Corte a kita cinco acusacion for di citacion contra Ex-Premier Henny Eman



Abogado mr. Oomen.

ORANJESTAD (AAN): — Corte a trata ayera e protesta di ex-premier Henny Eman contra e citacion cu el a haya pa cu e caso di Fondo di Desaroyo San Nicolas.

Abogado Oomen a bisa ora el a sali di e tratamiento, cu cos a bay bon y cu e caso a sali bastante na favor di su cliente.

Mr. Oomen a continua: “*E citacion tabatin seis acusacion den dje y di e seisnan aki, Corte a haya cu cinco no ta hustifica. Asina kier meen cu eseynan a cay afor y solamente un a resta cu Corte lo mester profundiza su mes den dje*”.

E acusacion cu a keda ta

regarda e presupuesto y e abogado a splica: “*E ta di tal forma complica cu Corte a haya cu den e fase aki, e no ta den e posicion pa bay profundo den dje. E lo mester wordo trata den e caso penal mes*”. El a indica cu e acusacion aki ta trata e pregunta si Eman a actua segun Leynan di Contabilidad y Presupuesto y a agrega: “*E ta mas bien algo administrativo*”.

Ooman a afirma di ta sumamente satisfecho cu e resultado y optimista alavez cu e acusacion cu a resta lo resulta positivo tambe pa Eman.

El a bisa: “*Nos ta hopi contento cu di un citacion basta largo, ta un so a keda. Den e procedura aki, Corte no por profundiza su mes den e materia, asina ta cusi e wak na prome vista cu un acusacion no ta na su lugar, e ta pone un banda. Aparentamente di e acusacionnan contra Eman, cinco no ta hustifica na prome vista caba*”.